

**PEMBERITAHUAN PERTANYAAN  
DEWAN RAKYAT**

**PERTANYAAN : BAGI JAWAB LISAN**

**DARIPADA : TUAN AHMAD MARZUK BIN SHAARY [  
PENGKALAN CHEPA ]**

**TARIKH : 16 OGOS 2018 (KHAMIS)**

**SOALAN : 14**

**Tuan Ahmad Marzuk bin Shaary [ Pengkalan Chepa ]** minta **MENTERI PENGANGKUTAN** menyatakan jumlah kemalangan maut sepanjang musim perayaan Hari Raya Puasa lalu dan dibuat perbandingan sejak 10 tahun lalu. Apakah pendekatan terbaru yang dilakukan oleh Kerajaan dalam mengurangkan kemalangan maut.

## **JAWAPAN**

Tuan Yang di-Pertua,

Kempen Keselamatan Jalan Raya dan OPS Bersepadu Bersempena dengan Perayaan Hari Raya Aidilfitri Peringkat Kebangsaan Tahun 2018 telah berlangsung dari 8 Jun 2018 hingga 22 Jun 2018. Dalam tempoh dua minggu tersebut, rekod kemalangan jalan yang dicatatkan adalah sebanyak 22,411 kemalangan di mana 235 merupakan kemalangan maut. Jumlah nyawa terkorban adalah sebanyak 248 orang. Berbanding dengan tempoh musim perayaan yang sama pada tahun 2017 di mana 257 nyawa terkorban daripada 22,402 kemalangan, rekod pada tahun 2018 tidak menunjukkan pengurangan yang ketara.

Data kemalangan pada musim perayaan Hari Raya Aidilfitri yang direkodkan oleh pihak PDRM dari tahun 2010 hingga 2018 telah menunjukkan sebanyak 176,932 jumlah kemalangan berlaku bagi tempoh tersebut dengan sebanyak 2,228 kemalangan maut dan 2,439 angka korban kematian dicatatkan. Sila rujuk Lampiran 1 untuk maklumat yang terperinci.

Pendekatan yang diambil oleh Kementerian dalam menjayakan Kempen dan OPS Bersepadu ini adalah dengan menyatupadukan semua Jabatan/Agensi/Swasta yang berkaitan terutamanya penguatkuasaan, rondaan dan pemantauan terhadap pengguna jalan raya bagi memastikan perancangan secara menyeluruh dapat dilaksanakan disamping kelancaran perjalanan semasa musim perayaan. Program advokasi dan kempen keselamatan jalan raya turut dijalankan di semua platform media elektronik dan media sosial bagi memberi kesedaran

mengenai keselamatan jalan raya pada musim perayaan.

Program-program oleh agensi-agensi penguatkuasa yang bertumpu kepada pengguna jalan raya juga diadakan sepanjang tempoh kempen yang meliputi pemeriksaan bas di depoh dan terminal serta ujian ari kencing pemandu bas, rondaan di sekitar kawasan-kawasan kerap kemalangan di semua jalan persekutuan dan negeri.

Sistem Mata Demerit juga telah dikuatkuasakan terhadap pemandu-pemandu kenderaan mulai 15 April 2017. Sistem ini akan dapat mendisiplinkan pemandu agar mematuhi peraturan Jalan raya. Sistem ini akan dapat mendidik mana-mana pemandu yang sering melakukan kesalahan berulang atau tegar dari berada di atas jalan raya untuk menjaga keselamatan pengguna Jalan raya yang lain.